

Izjava OHR-a na konferenciji za medije međunarodnih organizacija

OHR poziva Vijeće ministara da u četvrtak usvoji adekvatne nacрте zakona o javnom emitiranju

OHR poziva Vijeće ministara da ispoštuje sopstvene rokove za provedbu zahtjeva iz Studije izvodljivosti Evropske komisije te na svojoj sjednici u četvrtak usvoji adekvatne zakone o javnom emitiranju na državnom nivou.

OHR sa žaljenjem konstatuje da gospodin Dokić smatra ucjenom i pritiskom to što se traži od njega da ispoštuje zahtjeve za evropske integracije. OHR sa nestrpljenjem očekuje dan kada se Vijeću ministara neće trebati govoriti šta da učini da BiH uđe u Evropu, nego će aktivno preuzeti odgovornost za taj proces i to rado učiniti. Ukratko, OHR sa nestrpljenjem očekuje dan kada će svaki bh. minister staviti interese i sretnu budućnost za građane ove zemlje iznad svojih uskopoličkih interesa.

Nacrt zakona gospodina Dokića je neadekvatan iz razloga što ne poštuje Sporazum koji su potpisala trojica premijera 6. novembra 2003. godine. Taj nacrt naročito ne poštuje zahtjev Sporazuma o stvaranju, citiram Sporazum: "Zajednički pravni subjekat, koji zakonski formiraju tri emitera, a koji za svoj rad odgovara Upravnom odboru Sistema, i nadležan je za raspolaganje imovinom, za tehničke resurse, oglašavanje, međunarodno predstavljanje, prava vezana za strani program, kao i za usklađivanje sistema, politike i procedura između tri emitera." Kopije OHR-ovih komentara zašto nacrt gospodina Dokića ne poštuje Sporazum koji su potpisala trojica premijera nalaze se u predvorju.

Evropska komisija je jasno rekla da se zahtjevi iz Studije izvodljivosti neće ispuniti

ukoliko ovaj zakon ne ispoštuje Sporazum premijera u potpunosti. To znači da nacrt gospodina Dokića stavlja u rizik evropsku budućnost BiH.

Zbog toga OHR poziva Vijeće ministara da na svojoj sjednici u četvrtak usvoji nacrt zakona koji je predložio gospodin Dokić, ali sa odgovarajućim izmjenama i dopunama koje će ga dovesti u sklad sa Sporazumom koji su potpisala trojica premijera. OHR je zabrinut da prijedlog gospodina Dokića o procesu javne konsultacije može jednostavno predstavljati taktiku odgađanja. Prvo, to nije neophodno. Drugo, to se nikad prije u BiH nije činilo. I treće, to bi značilo da Vijeće ministara nije ispoštovalo sopstveni rok za provedbu zahtjeva iz Studije izvodljivosti. O ovom zakonu se treba iscrpno prodiskutirati. Ali u svakom demokratskom društvu, pravo mjesto da se to učini je u Parlamentu, i to čim prije je to moguće.

Zakon o javnim nabavkama

Još jedna tema, odbijanja Vlade RS da podrži Zakon o javnim nabavkama također je ugrozilo šanse Bosne i Hercegovine da ispuni zahtjeve iz Studije izvodljivosti Evropske komisije. To je bio povod da Evropska komisija suspenduje pomoć u procesu uspostave BiH Agencije za javne nabavke i Tijelo za reviziju nabavki. Implikacije za dalje intergacije u Evropsku uniju su jasne i ozbiljne. Pozicija Vlade RS je dodatno blokirala napore da se zaštite stotine miliona KM u fondovima građana koje razne vlade troše na javne nabavke svake godine. Vlada RS se obavezala krajem prošle godine da će usvojiti ovaj zakon, kao dio napora da se odgovori na skandale u javnim kompanijama otkrivene u izvještajima Specijalnog revizora. Premijer Mikerević je lično dao podršku ovom zakonu. Prema mišljenju OHR-a, neusvajanje ovog zakona će uveliko štetiti evropskim ambicijama Bosne i Hercegovine, te šansama njenih građana da uživaju u prosperitetu i sigurnosti koje članstvo u EU može osigurati.

OHR poziva Vladu RS da na prvo mjesto stavi interese građana ove zemlje, te ispoštuje prošlogodišnje preuzete obaveze brzim usvajanjem odgovarajućeg zakona o javnim nabavkama prihvatljivog za Evropsku komisiju.

Visoki predstavnik će se sastati sa ministrom odbrane

Sada nešto pozitivnije, visoki predstavnik Paddy Ashdown održat će svoj prvi sastanak sa ministrom odbrane BiH gospodinom Nikolom Radovanovićem u srijedu, 17. marta 2004. godine. Njegovo imenovanje je prvi korak ka stvaranju funkcionalnog i učinkovitog državnog ministarstva odbrane. Visoki predstavnik i građani BiH se nadaju da će imenovanje gospodina Radovanovića biti katalizator za suštinske reforme koje BiH i njeni entiteti trebaju poduzeti kako bi BiH ispoštovala zahtjeve za Partnerstvo za mir prije NATO samita u Istanbulu ovog ljeta. Obavijest za medije sa svim detaljima će biti poslata u toku dana.

Prvi zamjenik visokog predstavnika u Zvorniku

Ambasador Hays zajedno sa RS ministrom privrede, energetike i razvoja Milanom Bogičevićem, sutra putuje u Zvornik i Bratunac kako bi se sastali sa predstavnicima opština i poduzetnicima. Prvi zamjenik visokog predstavnika posjećuje opštine širom zemlje kako bi se upoznao sa opštinskim inicijativama koje su uspješno privukle investicije i otvorile nova radna mjesta u lokalnim zajednicama. On je također upoznat sa napretkom što su opštine ostvarile, kako same od sebe tako i u suradnji sa partnerima iz Vlade ili međunarodne zajednice, kako bi ekonomski i efikasnije građanima pružali bolje usluge.